



Yesu Klisto Azali Motindo
Moko, Lobi, Lelo Pe Libela

na

Ndeko William Branham

MALOPA MA EBANDELI

Buku oyo ekomami na ntina ete moto nyonso oyo akotanga yango akoka koyeba ete Yesu Klisto azali naino Kobikisa bato pe Kobikisa bokono na bango.

Nandimi ete Akoumela te mpo na komonana lisusu.

Buku oyo ezali koloba lolenge Aponaki elenge mobali moko mobola pe Abengaki ye na mosala na ye, ndenge elenge yango akimaki Ye na mwa ntango, pe na nsima ayaki epai na Ye na motema mobimba.

LIBONDELI

E Tata na Lola, soko Okoki kopambola moto nyonso oyo akotanga buku oyo.

Sala ete bayeba ete na mwa ntango moke Okobenga Lingomba moko na nguya, ya lolenge oyo naino tomona te.

Tozali ntango nyonso kondimela Yo.

Tia mposa makasi na motema moko na moko pe, e Moyengebeni, sunga mwa moombo na Yo ete amema Nsango na Yo.

Nayebi ete mpo na ntina moko nde Obombaki ngai kati na ekolo, ndenge Obombaka Mose.

Na bongo, Tata, sunga ngai ete nakembisa Nkombo na Yo, mpo nasengi yango na Nkombo na Yesu.

Amen.

Yesu Klisto Azali Motindo Moko, Lobi, Lelo Pe Libela

Nabotama na mabele ya Cumberland, Kentucky, na mwa ndako ya nzete. Tata pe mama na ngai babalanaki bilenge pe nazali mwana na bango ya liboso. Mama ayebisaki ngai ete mokolo moko, ntango nazalaki bobele penepene na sanza motoba, pe papa azalaki na mobembo, tokangamaki na ndako mikolo ebele mpo matandala ekweaki mingi na ngomba. Tozalaki lisusu na bilei te pe mama akomaki kolemba moke moke. Na suka na yango akanisaki ete suka ekomaki. Alobaki ete asangisaki bilamba na biso nyonso pe bilamba ya mbeto, amemaki ngai na maboko na ye pe azingaki biso na yango nyonso mpo tokoka kozala na mwa moto na ndenge oyo ekoki.

Ndeko motangi, nabanzi ete elingaki kozala suka soki na ntango yango Mobikisi na biso na bolingo akotaka na mosala te. Kasi Azali ntango nyonso pene pe Amonanaka ntango nyonso na ngonga malamau. Alobaki na molingami mozalani moko ya motema bule, Ayebisaki ye ete aya kotala mpo na nini molinga ezalaki kobima te na mombonda na biso uta mwa mikolo. Ntango akomaki pe akotaki na mwa ndako yango pe akutaki ngai na mama pene na kokufa na nzala. Azuaki nkoni pe apelisaki moto. Na nsima azongaki na mwa ndako na ye mpo amemela biso bilei. Na mwa ntango moke makasi pe bokolongonu ekomaki kozongela biso. Nkombo na Ye ekumisama mpo na yango.

Ntango moke nsima na yango, tolongwaki na etuka ya Kentucky pe tokendeki kofanda na Indiana. Papa akendeki kosala epai ya nkolo elanga moko pene na Utica, na Indiana. Tofandaki kuna pene na mobu moko pe nsima na yango tokitaki moke, tokendeki kofanda na lobwaku ya Ohio. Mibu ebele elekaki nakolaki pe nakomaki mobali monene ntango Nzambe asololaki na ngai.

Mokolo moko na pokwa nazalaki komema mai na ndako na biso uta na ndako ya bibwele, oyo ezalaki pene na balabala oyo elandi. Pene na katikati ya nzela kolongwa na ndako na biso kino na oyo ya bibwele, nzete moko ya libene ya kala ezalaki wana. Nautaki kokoma na ndako kolongwa na kelasi na pokwa wana pe bilenge mibali mosusu, bazalani na biso bazalaki kokende kolobo na eziba ya kala. Nazalaki kolela mpo nakende, kasi papa alobaki ete esengelaki namema mai. Natelemaki mpo na pema na nse ya nzete yango pe pwasa nayokaki mopepe koningisa nkasa. Nayebaki ete mopepe ezalaki epai mosusu te. Emonanaki ete nsima na nzanga wana ezalaki mpenza kimia. Nazongaki nsima longwa na nzete yango pe namonaki ete ezalaki na esika moko ezalaki na bonene ya engwongolo epai wapi emonanaki lokola mopepe ezalaki koningisa nkasa. Nde na ntango yango mongongo moko eyokanaki : “Komela masanga soko moke te, komela makaya soko moke te, pe koyeisa mbindo na nzoto na yo soko moke te ata na lolenge nini, mpamba te Nazali na mosala moko mpo na yo ntango okokola.”

Ebangisaki ngai mingi na lolenge ete nazongaki mbangu na ndako, kasi nayebisaki yango ata na moto moko te. Nakokaka komela masanga to makaya ata moke te. Nandimi ete Nzambe akosala mosala monene na mikolo na suka.

Ntango nakolaki na ndenge ekoki mpo nabima na baninga bilenge, bazalaki kotumola ngai pe kobenga ngai bibangabanga mpo ete nazalaki komela makaya to pe masanga te. Bazalaki koloba ete ata bana basi bazalaki komela makaya ete balekaki ngai na mpiko. Nazalaki bongo na nsoni mpo na koyebisa bango likambo oyo esalemaki na bomoi na ngai. Kasi, baninga ya bolingo, ya solo nazali lelo na litundu ya koyebisa yango epai na bato. Aleluya!

Ntango nakomaki penepene na mibu zomi na minei bazokisaki ngai mpota monene na bokila. Nasalaki sanza nsambo na lopitalo. Nzambe azalaka kosolola na ngai kasi nazalaki koboya koyoka. Bobiangemi ebandaki moke moke kokoma solo mpo na ngai. Kasi lokola nabokolomaki na libota

ya Baklisto te nazalaki komeka kotelemela yango. Mbala mingi nayokaki mongongo moke oyo ya bopolo kobenga ngai, kasi nazalaki koboya yango. Nakomaki kino kolinga lisusu koyoka ata nkombo ndakonzambe te.

Mokolo moko nakanaki ete nazuaki nzela ya kokabwana na bobiangemi yango. Nalingaki kokende na elimwelo na moi mpo na kosala na elanga moko ya monene. Moninga na ngai, Nzambe azali mpenza monene kuna motindo moko na bisika nyonso. Tika ete ozua mayele na oyo ngai nabikelaki. Soki Abengi yo, yanola Ye.

Na ntongo moko ya sanza ya libwa na mobu 1927, nayebisaki mama ete nazalaki kosala mobembo na molako ya Tunnel Mill, oyo ezali penepene na milles zomi na minei [km 20—N.D.T.] kolongwa na Jeffersonville epai wapi tozalaki kofanda na eleko wana. Nasilaki kosala mwango ya kokende na Arizona elongo na baninga mosusu. Ntango mama ayokaki nsango na ngai lisusu, nazalaki na Tunnel Mill te kasi na Phoenix, na Arizona, nazalaki kokima Nzambe na Bolingo. Lobiko kati na elanga ezalaki malamuni mingi na ntango moke, kasi eumelaki te mpo na kokoma bololo lokola bisengo mosusu nyonso ya mokili. Kasi tika naloba awa, nkembo na Nzambe, lobiko elongo na Yesu ekomaka ntango nyonso kitoko koleka pe ekomaka bololo soko moke te. Yesu apesaka ntango nyonso kimia pe libondisi oyo ebongi be.

Mbala mingi nayokaki mopepe kopepa kati na nzete minene ya tidala. Ezalaki lokola nazalaki koyoka mongongo na Ye kobenga, mosika kati na zamba, kolobaka : “Adamu, ozali wapi?” Emonanaki lokola minzoto ekomaki pene na lolenge ete bakokaki kokamata yango na loboko. Emonanaki ete Nzambe akomaki pene mpenza.

Eloko moko oyo emonani na motuya mpo na ngai na oyo etali etuka wana, ezali nde banzela ya eliki. Soki omeki kolongwa na nzela, okobunga na bolembu mpenza. Mbala mingi mpenza soki bato na mibembo bamoni felele mike ya eliki, balongwaka na balabala mpo na kobuka yango. Bakobanda koyengayenga kati na eliki pe bakobunga, pe ntango mosusu bakufaka na mposa ya

mai. Ezali motindo moko na nzela ya boklisto – Nzambe azali na balabala moko. Alobeli yango na Yisaya, mokapo ya 35. Nkombo na yango “Balabala ya Bosantu”. Mbala mingi bisengo ya mpamba ya mokili oyo ebendaka bato libanda na nzela. Na ntango yango obungisi lobiko na yo na Nzambe. Soki moto abungi na kati ya eliki, akomona mbala mosusu ekosa miso. Mpo na baoyo bazali kokufa na mposa ya mai, ekosa miso oyo ekozala ebale to etima. Mbala mingi bato bakolanda yango pe bakomibwaka na kati na yango pe bakomona ete bazali bobele kopotana kati na zelo ya moto. Mbala mosusu zabolo akotalisa yo eloko moko oyo ye abengi yango bisengo. Ezali bobele ekosa miso, ezali eloko moko oyo ezali te. Soki oyoki okomibakisela bobele mawa likolo na moto. Ndeko motangi, koyoka ye te. Ndimela Yesu oyo apesaka mai na bomoi epai na baoyo bazali na nzala pe na mposa.

Mokolo moko nazuaki mokanda oyo eutaki epai na biso koyebisa ngai ete moko na bandeko na ngai ya mibali azalaki kobela makasi.

Ezalaki nde Edward, oyo alandi ngai. Solo lokola nakanisaki ete ezalaki likambo monene te, nakanisaki ete akoyoka malamumu. Kasi na pokwa moko nsima na mwa mikolo, ntango nautaki na engumba pe nalekaki na esika ya kolia kati na elanga, namonaki eteni ya lokasa likolo ya mesa. Nakamataki yango. Ekomamaki: “Bill, yaka na elanga ya matiti epai na likolo. Ezali na motuya mingi.” Nsima na ngai kotanga mwa mokanda yango, ngai na moninga moko tokendeke na elanga yango ya matiti. Moto ya liboso oyo nakutanaki na ye ezali mobange moko mobateli na ngombe ya Texas oyo azalaki kosala na elanga yango. Nkombo na ye ezalaki Durfy, kasi biso tozalaki kobenga ye “Pop”. Elongi na ye ezalaki kotalisa mawa alobaki: “Billy, mwana na ngai, nazali na nsango ya mawa mpo na yo.” Na ntango yango kapita akomaki wana. Bayebisaki ngai ete telegrame moko eutaki kokoma na nsango ya liwa ya ndeko na ngai ya mobali.

Moninga wa bolingo, na mwa ntango moko nakokaki lisusu koningana te. Ezalaki liwa ya liboso na kati ya libota na biso. Kasi nalingi koloba ete eloko ya liboso oyo nakanisaki

ezalaki soki amilengelaki mpo na liwa. Ntango nabalukaki pe natambwisaki miso likolo ya esobe oyo ekaukaki, mpizoli ezalaki kosopana na matama na ngai. Nakanisaki ndenge tozalaki koboma nzoto elongo ntango tozalaki bana mike pe ndenge ezalaki mpasi mpo na biso.

Tozalaki kokende kelasi na bilei oyo ezalaki kokoka mpenza te. Sapato na biso ezalaki kobimisa misapi, pe tosengelaki kolata mikoto ya kala oyo ekangamaki na pingle na nkingo mpo ete tolataki simisi te. Pe namikaniselaki lisusu mokolo oyo Mama atielaka biso pop-corn na katini ya moke mpo tolia na moi. Tozalaki kolia elongo na bana mosusu te. Tozalaki na makoki ya kosomba bilei ndenge moko na oyo ya bango te. Tozalaki kokende komibomba mikolo nyonso nsima na ngomba mpo na kolia. Namikaniseli ete mokolo oyo toliaki pop-corn ezalaki mpenza limpati mpo na biso. Bongo mpo nandima ete nazui ndambo oyo ya ngai, nabimaki liboso na nzanga, natondisaki loboko meke pe naliaki yango liboso ete ndeko na ngai azua ndambo oyo ya ye.

Na bongo natambwisaki miso likolo na esobe oyo ekaokaki na moi, nazalaki kokanisa makambo oyo nyonso pe nazalaki komituna soki Nzambe amemaki ye na esika ya malamumu koleka. Wana lisusu Nzambe abengaki ngai, kasi lokola momeseno namekaki koboya.

Namilengelaki ete nazonga epai na biso mpo na bokundi ebembe. Mokengeli McKinny ya Ndakonzambe ya Port Fulton, mobali oyo azali lokola tata mpo na ngai, ntango ateyaki na bokundi ebembe, alobaki boye : “Ntango mosusu ndambo na bato bazali awa baoyo bayebi Nzambe te, soki bazali, botalela Ye sikawa.”

Oo, ndenge nakangaki kiti na ngai, lisusu Nzambe azalaki kosolola na ngai. Ndeko motangi, soki Abengi yo, yanola Ye.

Nakobosana soko moke te, Papa pe Mama na ngai, babola mibange oyo, ndenge balelaki nsima na bokundi ebembe. Nalingaki kozonga na elimwelo na moi kasi mama abondelaki ngai mingi natikala na lolenge ete, sukasuka, nayaki kondima kotikala soki nakokaki kozua mosala. Naumelaki te kozua mosala ya leta na Indiana, epai wapi nazali kosala lelo.

Penepene na mibu mibale nsima na yango wana nazalaki kotala ba-compteur na ndako ya ba-compteur ya kompani ya gaz ya New Albany, ngenge ya gaz ekotelaki ngai pe etungisaki ngai mposi ebele. Nakendeki kokutana na minganga nyonso oyo nayebaki. Eloko moko ekitisaki mpasi na ngai te. Nazalaki koyoka mpasi na likundu mpo na mitika ya ngenge ya gaz. Bokono ebandaki kokoma makasi koleka. Batindaki ngai nakende kokutana na minganga minene ya Louisville, na Kentucky. Bango basukaki na koloba ete ezalaki nde apendice na ngai pe bayebisaki ngai ete nasengelaki koleka na epaso. Nakokaki kondima yango te, mpo nayoka naino mpasi na mopanzi te. Minganga balobaki ete bakokaki kosala eloko mosusu mpo na ngai te soki naleki na epaso te. Na suka nadimaki ete esalema, kasi nasengaki ete basalela bobele nkisi oyo ebomaka eteni ya nzoto mpo nalanda ndenge bakosala epaso.

Oo, nalingaki ete moto moko oyo ayebi Nzambe azala pene na ngai. Nazalaki kondimela libondeli kasi nazalaki kokoka kobondela te. Na bongo mokengeli ya Première Eglise Baptiste akotaki elongo na ngai na ndako ya epaso.

Ntango balongolaki ngai na mesa ya epaso mpo batia ngai na mbeto nakomaki koyoka nzoto na ngai kolemba moke moke. Motema na ngai ezalaki kobeta mpenza te. Nayokaki liwa koyela ngai. Mpema na ngai ebandaki kokoma mokuse koleka. Nayebaki ete nakomaki na suka ya mobembo na ngai. Oo moninga na ngai zela naino ete okoma wana mokolo moko, nde okokanisa makambo ebele oyo osala. Nayebaki ete namelaka makaya soko moke te, ata masanga te to nazalaki ata na bizaleli ya mbindo te kasi nayebaki ete namilengelaki te mpo na kokutana na Nzambe na ngai.

Moninga na ngai, soki ozali bobele mondimi moko ya mpio pe ya makambo ya libanda na kati ya lingomba okoyeba ntango okokoma na suka ete omilengeli te. Na bongo, soki yango nde nyonso oyo oyebi na ntina na Nzambe na ngai, nasengi na yo ete ofukama sikasikawa pe osenga na Yesu ete apesa yo lobiko oyo ya Mbotama na sika, oyo asololaki na ntina na yango na Nikodeme na Yoane, mokapo ya 3, pe oo, boni ngonga ya esengo ekobeta — Nkembo na Nkombo na Ye.

Molili ebandaki kokoma makasi koleka na eteni yango ya lopitalo ezalaki lokola na kati ya zamba monene. Nazalaki koyoka lokola mopepe koningisa nkasa, kasi ezalaki lokola mosika mpenza na kati ya zamba. Nabanzi osila koyoka lokito ya mopepe, ntango ezali kopusana moke moke pene na yo pe ezali koningisa nkasa.

Namilobelaki : “Boye, kufa nde ezali koya kokamata ngai.” Oo! molimo na ngai ezalaki kokende kokutana na Nzambe, namekaki kosambela kasi nakokaki te.

Mopepe ezalaki kobeleva, na konguluma makasi koleka. Makelele ya nkasa eyokanaki mbala na mbala pe mbala moko nakendeki.

Ezalaki lokola nazongaki elenge, makolo ngulu, nazalaki na nzela wana, bobele na nse ya nzete yango. Nayokaki se mongongo yango moko oyo elobaka : “Komela masanga pe makaya soko moke te.” Pe makelele ya nkasa oyo nazalaki koyoka, ezalaki ndenge moko na oyo ezalaki kouta na nzete yango mokolo wana.

Kasi mbala oyo mongongo yango elobaki : “Nabengaki yo kasi oboyaki kotosa.” Elobaki yango mbala ya misato.

Bongo nalobaki : “Nkolo, soki ezali Yo, tika ete nazonga na mokili pe nakosakola Nsango Malamu na Yo likolo na ndako pe na suka ya banzela. Nakoyebisa yango na moto nyonso!”

Ntango emononeli oyo esilaki, namonaki ete namiyokaka naino malamumu koleka boye te. Monganga oyo apasolaki ngai azalaki naino na kati ya lopitalo. Ayaki pe atalaki ngai pe akamwaki. Atalaki ngai lokola nde akanisaki ete nakokufa bongo alobaki : “Nazali moto oyo akendeke ndakonzambe te, mosala na ngai eleki ndelo, kasi nayebi ete Nzambe akutani na mwana oyo.” Mpo na nini alobaki bongo, nayebi te. Moto moko te alobaki likambo mpo na yango. Soki na eleko wana nayebaki oyo nayebi sasaipi, nalingaki koteleva kolongwa na mbeto yango na koganga mpo na kokumisa Nkombo na Ye.

Nsima na mwa mikolo, bapesaki ngai ndingisa ya kozonga na ndako kasi nazalaki naino kobela pe nasengelaki kolata

maneti mpo ete nazalaki komona malamumu te. Moto na ngai ezalaki koningana ntango nazalaki koumela kotala eloko moko swii.

Nabandaki koluka kokutana na Nzambe. Nazalaki kokende lingomba na lingomba koluka esika moko epai wapi bakokaki kobenga bato na etumbelo na lolenge ya kalakala. Likambo na mawa ezalaki ete nazuaki ata moko te. Nalobaki ete soki nazalaka Moklisto, mbele nazalaki oyo ya solo. Moteyi moko oyo ayokaki ngai koloba boye alobaki na ngai : “Omoni Billy mwana na ngai okomi sikawa kopengwa kati na bilandalanda.” Nalobaki ete soki nazalaka mosambeli nalingaki koyoka yango ntango elingaki kosalema lokola bayekoli bayokaki yango.

Oo, nkembo na Nkombo na Ye. Nakomaki kosambela nsima na mwa ntango pe nazali kaka bongo pe na lisungi na Ye nakozala kaka bongo.

Na pokwa moko nakomaki na mposa makasi ya Nzambe pe ya koleka na lobiko oyo ya solo na lolenge ete nakendeki na ndako moko ya kala na nsima ya ndako pe namekaki kosambela. Na eleko wana nayebaki ndenge ya kosambela te bongo nabandaki bobele kolobela Ye lokola nakokaki kolobela moto nyonso. Pwasa pole moko ekotaki na mwa ndako yango ezuaki lolenge ya ekulusu pe mongongo kouta na ekulusu yango elobaki na ngai na lokota oyo nasosolaki te. Na nsima elimwaki. Natikalaki lokola ekeko. Ntango bomoto na ngai ezungaki, nasambelaki lisusu : “Nkolo soki ezali Yo nabondeli Yo, yaka lisusu kolobela ngai.” Uta ntango nabimaki na lopitalo nazalaki kotanga Biblia na ngai pe natangaki na Yoane 4 : “Balingami, bondima milimo nyonso te, kasi bomeka milimo soki miuti na Nzambe.”

Nayebaki ete molimo moko ebimelaki ngai, pe wana ezalaki ngai kosambela emonanaki lisusu. Na bongo ezalaki lokola balongolaki na molimo na ngai bozito ya livres nkoto [kilo nkama mitano—N.D.T.]. Na mbala moko natelemaki pe nakimaki mbangu kino na ndako pe emonanaki lokola ete nazalaki kokima mbangu na mipepe.

Mama atunaki ngai : “Bill, likambo nini ekomeli yo?”
Nayanolaki : “Nayebi te kasi nazali komiyoka malamumu pe pepele.” Nakokaki lisusu kofanda na ndako te. Esengelaki nabima pe nakima mbangu.

Na ntango wana nayebaki ete soki Nzambe alingaki ete nateya Alingaki kobikisa ngai, bongo nakendeki na lingomba moko epai wapi bazalaki kondimela bopakoli mafuta pe nabikisamaki na mbala moko. Na bongo namonaki ete bayekoli bazalaki na eloko moko oyo bateyi mingi bazali na yango te lelo. Bayekoli babatisamaka na Molimo Mosantu nde mpo na yango bakokaki kobikisa babeli pe kosala bikamwiseli minene na Nkombo na Ye. Nabandaki bongo kosambela mpo nazua libatisi ya Molimo Mosantu pe nazuaki yango.

Mokolo moko penepene na sanza motoba nsima na yango, Nzambe apesaki ngai mposa ya motema na ngai. Alobelaki ngai kati na pole monene kolobaka ete nakende koteya pe kobondela mpo na babeli pe ete Akobikisa bango ata soki bokono na bango ezali nini. Nabandaki koteya pe kosala oyo Ayebisaki ngai ete nasala. Oo moninga na ngai, nakoki te kobanda koyebisa bino makambo nyonso oyo esalemi : Miso na bakufi miso efungwamaki. Batengumi batambolaki, bato na cancer babikisamaki pe bikamwiseli ya lolenge nyonso esalemaki.

Mokolo moko na suka ya balabala Spring, na Jeffersonville, na Indiana, nsima na mayangani ya kolamuka ya mposo mibale, nazalaki kobatisa bato 130. Ezalaki mokolo moko ya molunge na sanza ya mwambe pe penepene na bato nkoto misato bazalaki wana. Nakomaki pene ya kobatisa moto ya 17 ntango na pwasa nayokaki lisusu mongongo oyo moke, ya kimia pe elobaki : “Tombola miso.” Na mokolo yango ya molunge na sanza ya mwambe moi ezalaki kongala. Ekokaki pene na mposo misato mbula ebetaki te. Nayokaki lisusu mongongo yango, pe lisusu mpo na mbala ya misato elobaki : “Tombola miso.”

Natombolaki miso pe monzoto moko monene na kongenga ebimaki uta likolo oyo nasila komona mbala na mbala kasi

nayebisi bino yango naino te. Mbala mingi nalobelaki bato na ntina na komonana na yango pe bazalaki bobele koseka pe koloba : “Bill, ezali bobele makanisi na yo. To ntango mosusu ozalaki kolota.” Kasi nkembo na Nzambe, na mbala oyo Amitalisaki na lolenge ya polele liboso na bato nyonso, mpo ete eyaki mpenza pene na ngai na lolenge ete nakokaki ata koloba te. Nsima na ndambo na sekonde, nagangaki pe bato mingi batombolaki miso pe bamonaki monzoto yango mpenza likolo na ngai. Ndambo na bato basenzwaki na ntango oyo bamosusu babandaki koganga pe bamosusu bakimaki. Na nsima monzoto yango ezongaki na likolo, pe esika yango eutaki ezalaki penepene na bonene ya pieds carrés zomi na mitano [mètres carrés mitano—N.D.T.], pe esika yango mai ekobaki koningana pe kozunguluka to lokola nde mbonge ezalaki kolandana. Lipata moke ya pembe esalemaki na esika yango, pe monzoto yango ekotaki na kati ya lipata moke oyo.

Ndeko motangi, soki bobele nazala na esika kati na buku oyo mpo na kolobela yo na ntina na makambo mingi oyo esalemi, ndenge ndakonzambe na biso etongamaki, pe na mayangani mingi ya kolamuka ya nguya oyo tosalaki na kati na yango. Bato bautaki bipai na bipai mpo na kozua lobiko ya nzoto. Kasi nakosengela koyeisa buku oyo moke ndenge ekoki mpo ete etekama na ntalo malamumu pe moto nyonso azala na makoki ya kosomba yango. Ntina na makambo oyo ezali mpo nayebisa yo ete Yesu Klisto azali ntango nyonso motindo moko ndenge Azalaki lobi pe lelo pe libela, pe ete osengeli kondimela Ye pe obikisama. Soki okoki koya, na ntango nyonso oyo mayangani na biso ekozala pene na yo, yaka.

MATATOLI

Sasaipi na nkasa oyo ezali kolanda bokokuta ndambo ya matatoli oyo bato bapesi bango moko baoyo babikisami na nzoto kati na mayangani na biso mosusu.

Ntango nayokaki bato koloba na ntina na Ndeko Branham, nazalaki na lopitalo, na New Albany, na Indiana. Motuka moko etutaka ngai. Penepene mikuwa na ngai nyonso ya mpanzi ebukanaki. Pe nazalaki koyoka mpasi makasi na mokongo. Elikia ezalaki lisusu te mpo na bokono na ngai, na oyo etali lisungi ya monganga.

Ndeko Branham abondelaki mpo na ngai, pe mbala moko mipanzi na ngai ezongaki na bisika na yango, mokongo na ngai pe lokola. Monganga akokaki kososola te. Natelemaki, nalataki bilamba na ngai, nazongaki na ndako, pe nazongelaki mosala.

Nkembo na Nzambe mpo na Nguya na Ye ya kobikisa bokono.

William H. Merrill, 1034, balabala Clark, New Albany, Ind.

Nazalaki ebosono uta mibu ebele. Nazalaki kaka na mbeto uta mwa ntango. Makolo na ngai ekomaki mike na lolenge ete nazalaki lisusu kokoka kotambola te. Monganga alobaki ete nakotambola lisusu te. Nayokaki nsango ya Ndeko Branham pe ndenge Nzambe azalaki koyanola mabondeli na ye. Na bongo nabengaki ye. Ye na elenge mobali mosusu nkombo na ye, DeArk, bayaki pe babondelaki mpo na ngai. Makolo na ngai ebikaki mbala moko. Natambolaki. Natambolaka kino lelo. Likambo yango esalemaki eleki mibu 4.

Nakumisi Nzambe mpo na Nguya na Ye ya Kokamwa.

Mme Mary Der Ohanion, 2223 balabala Oak E., New Albany, Ind.

Epai na ye oyo esengeli,

Nazalaki ebosono uta mwa ntango molai. Nabukanaki makolo pe nakokaki lisusu kotambola te. Kokokana na maloba ya monganga. Mwana na ngai ya mobali amemaki ngai na kiti na ngai ya bibosono kino na liyangani ya Ndeko Bill. Na pokwa wana namonaki mobali moko azalaki kotambola te uta mibu 18 kobanda kotambola. Namonaki pe mobali moko kofungwama miso, pe kotambola na kati ya ndakonzambe ata na lisungi moko te. Azalaki mokufi miso mibu 40 mobimba, pe ebele na bamosusu, bibosono pe na bokono ndenge na ndenge babikisamaki na pokwa wana. Na bongo ntango ngala na ngai ekokaki ete babondela mpo na ngai, nazalaki na kondima mpo na kondimela Yesu, ete Azali motindo moko lobi, lelo, pe libela na libela. Ndeko Bill abondelaki mpo na ngai, asimbaki ngai na loboko pe alobaki : “Na Nkombo na Yesu tambola.”

Nayokaki Nguya na Nzambe koya likolo na ngai. Makolo na ngai oyo ezalaki ya kokangama liboso na ngai ekitaki kino na nse, pe nabandaki kotambola, nkembo na Nzambe, natikaki kiti na ngai ya bibosono, pe natambolaki na balabala ebele na makolo mpo na kozonga na ndako.

Mme T. Hargrove, 149, balabala Spring, Jeffersonville, Ind.

Eleki mibu mibale batikaki ngai nakufa na cancer. Nayebaki Ndeko Bill uta mibu ebele. Nayebaki ete azali moto na sembo pe nazalaki kokende na mayangani na ye mingi. Mpamba te Nzambe azali kopambola ye pe kosala bikamwiseli mingi mpenza na nzela na ye. Nabengaki ye mpo abondela mpo na ngai. Cancer na ngai elimwaki.

Nazali naino na esengo kino lelo, kokumisa pe kotondo Nzambe.

Mme L. Stinner, av. Missouri, Jeffersonville, Indiana

Monganga na biso ya libota alembaki ngai pe alobaki ete natikalaki bobele na bomoi ya ngonga moke. Nazalaki na bokono ya cancer pene na mibu 3.

Mobali moko na nkombo Wiseheart asololaki na ngai na ntina na Ndeko Bill. Batambolaki milles 35 [koleka 55 km—N.D.T.] na motuka na nzela oyo etondaki na matandala pe na moselu mpo na kokoma esika nazalaki. Ntango bakomaki wana, baninga pe bandeko ebele basilaki kosangana mpo na komona ngai mbala na bango ya suka. Bana na ngai ya basi basilaki kosomba bilamba ya kokunda ngai na yango. Nazalaki komiyeba lisusu mpenza te ntango Ndeko Bill akomaki wana. Asengaki ete bazangi kondima nyonso babima na eteni wana. Nde afukamaki pe abondelaki mpo na ngai. Nayokaki Nguya na Nzambe likolo na ngai ntango atiaki loboko na ye likolo na oyo ya ngai, pe nayokaki mbala moko ete cancer na ngai esilaki.

Natelamaki, na kokumisaka Nzambe mpo na Nguya na Ye. Likambo yango esalemaki eleki mibu 4 pe uta ntango yango natikali lisusu kobela cancer te.

Nkembo na Nzambe mpo na bolamu na Ye.

Mme Sarah Hoyse, Middletown, Ind.

Nabotamaki ebosono. Nakokaki kotambola soko moke te to kosimba pe kosalela maboko na ngai. Nayokaki nsango ya esika oyo Ndeko Bill azalaki kosala liyangani monene ya lobiko na nzoto. Nakendeki kuna pe namonaki makambo libanda na momeseno kosalema na nzela na kondima na Nkombo na Yesu pe na kotielu bato maboko.

Ndeko Bill abondelaki mpo na ngai, na nsima atalaki ngai swii pe alobaki : “Na Nkombo na Yesu, tambola.” Nayokaki Nguya na Nzambe koya likolo na ngai. Natosaki, pe mpo na mbala ya liboso na bomoi na ngai nabandaki kotambola. Nazalaki na mibu 35.

Nzambe azali kosala makambo na kokamwa na mikolo oyo ya suka.

Nkombo na Ye ekumisama libela na libela.

Mwana na biso ya mwasi, Betty, azalaki na bokono sanza misato. Tozali na minganga minene mibale ya engumba, kasi emonanaki ete, bakokaki koyeba ntina na yango te. Tozalaki pe na bateyi minene mingi ya engumba na biso pe ya zongazonga mpo babondela mpo na ye. Bokono na ye ezalaki ntango nyonso kokoma makasi. Na bongo tobengisaki mobali moko ya Jeffersonville, Ind., Rev. Wm. Branham, oyo azali na likabo ya lobiko na nzoto kouta na Nzambe. Ndeko Bill, ndenge babengaka ye, ayaki epai na biso kaka na ngonga wana. Nsima na ye kobondela ngonga molai, akotaki pe ayebisaki biso ete Nkolo atalisaki ye na nzela ya emononeli oyo tosendelaki kosala mpo na mwana na biso Betty. Atikalaki bobele mposo na mikuwa ya mpamba pe azalaki kolenga ntango nyonso lokola moto oyo azali na ebukabuka. Ndeko Bill atunaki biso soki tolingaki kondimela Nzambe pe kotosa oyo Alingaki koloba tosala. Nsima na ye kobondela pe kobelela Nkombo na Yesu likolo na ye, mwana na biso ya mwasi abikisamaki mbala moko. Likambo oyo esalemaki eleki penepene sanza zomi. Sasaipi mwana na biso Betty azali na nzoto kolongonu pe monene na ndenge elongobani. Nakosepela kokomela moto nyonso oyo azali na ntembe na ntina na lobiko na ye to na ntina na kobikisama na nzoto oyo esalemaki na kati ya mayangani ya kolamuka oyo Ndeko Branham asalaki awa na Saint Louis na 1945.

Kobikisama na nzoto oyo esalemaki na kati ya mayangani ya kolamuka ya Saint Louis ekomami na bolai na buku ya Ndeko Branham ebengami “Emononeli ya Lola”. Bozanga kotanga yango te.

Rev. Robert Daugherty, 2009, av. Gano, St Louis, Mo.

EPAI NA YE OYO ESENGELI :

Nazalaki kaka mokongo na mbeto mibu 8 na sanza 9 mpo na tuberculose pe minganga balembaki ngai. Nazalaki ata kokokisa te livres 50 [kg 20—N.D.T.] pe emonanaki ete elikia nyonso esilaki. Na bongo, uta na Jeffersonville, Ind., pene na

ntaka ya milles 35 [km 55] uta epai na biso, Rev. Wm. Branham ayaki, uta na emononeli oyo azuaki na ntina na mwana mpate oyo akangamaki na motambo na zamba pe azalaki koganga : “Milltown” (Ezali esika oyo nafandaka). Ndeko Branham atikala koya awa ata mbala moko te pe ayebaki moto moko ya awa te. Ntango akotaki, atielaki ngai maboko pe abondelaki, abelelaki Nkombo na molingami na biso Nkolo Yesu likolo na ngai. Ezalaki lokola eloko moko ekangaki ngai pe mbala moko natelemaki pe nazongisaki matondi epai na Nzambe mpo na Nguya na Ye ya kobikisa. Nabimaki libanda na ndako mpo na mbala ya liboso nsima na mibu 8, pe na nsima nabatisamaki na ebale, na Nkombo na Yesu Klisto. Nazali sasaipi mobeti piano na lingomba ya ba-baptiste ya awa. Lobiko oyo na nkembo ememaki makambo mosusu ebele. Esika ekokoka te mpo na kokoma nyonso wana na kati ya litatoli oyo. Nakozala na esengo kokomela na bolai moto nyonso oyo akosepela ete nayevisa ye oyo etali kobikisama na ngai.

Georgia Carter, Milltown, Indiana

EPAI NA YE OYO ESENGELI :

Bapasolaki ngai pe uta na epaso yango, cancer moko ebimelaki ngai na nzoto. Nasalaki nyonso oyo nakokaki kosala mpo na kozongela bokolongonu bwa nzoto, kasi nalongaki te. Mwasi na ngai azalaki pe kobela, pe toyokaki nsango ya Ndeko Branham pe lolenge Nzambe azalaki kosala na nzela na ye mpo na kobikisa babeli. Tokendeki epai na ye mokolo moko ya lomingo na nsima ya nzanga esili koleka penepene sanza motoba, pe ntango tokomaki tokutaki bato mosusu kuna bobele mpo na yango pe bazalaki kobikisama. Bongo tosololaki na Ndeko Branham pe totunaki ye soki likambo moko ekokaki kosalema mpo na biso. Toyebisaki ye ete tozalaki Bakatoliko kasi alobaki na biso ete lobiko na nzoto kouta na Nzambe ezali mpo na baoyo nyonso bandimi. Ayebisaki biso likambo ya mwasi moko Mokatoliko oyo miso na ye efungwamaki uta asengaki Nzambe ete asunga ye, pe sasaipi akoki kotanga makomi ya mike. Azalaki mpenza mokufi miso na lolenge ete

basengelaki kosimba ye na loboko mpo bamema ye kino na ndako ya Ndeko Branham. Na nsima abondelaki mpo na ngai na mwasi na ngai pe biso mibale tobikisamaki. Cancer na ngai elimwaki! Sasaipi tozali mpenza na esengo pe na nzoto kolongonu pe ntongo nyonso nalongwaka na mbeto pe nabondelaka ngonga 3 mpo na Ndeko Branham pe mpo na mosala azali kosala mpo na Nzambe. Nazali na kompani ya lotiliki awa na engumba na biso pe na ntongo ya lomingo nyonso tokendeke na misa ma yambo pe na nsima tokatisaka gbagba nokinoki mpo na kokende na Branham Tabernacle. Tozalaka pe na mayangani ya pokwa pe na mayangani ya mabondeli ya mokolo ya misato na pokwa. Tozali kobikela ntango kitoko pe ezali lokola nde tozali kobika na mokili ya sika. Nakosepela koyanola na mikanda nyonso mpo na baoyo bakolinga koyeba makambo mosusu na ntina na lobiko na ngai.

Louis H. Head, 417 Garnet Court, Louisville, Ky.

Nalingi kobakisa litatoli na ngai mpo na nkembo na Nzambe na oyo etali lobiko na nzoto kouta na Nzambe. Penepene na mibu misato nazalaki kobela maladi ya mpese, oyo ezalaki ntango nyonso kopanzana pe kokoma makasi na lolenge ete likolo ya maboko pe ya makaka na ngai etondaki na bikokoto. Evimbaki mingi pe ezalaki kosala ngai mpasi makasi. Mwa 11 sanza ya minei 1945, Ndeko Branham apakolaki ngai mafuta, atielaki ngai maboko mpo na kobondela, kasi na esika nakoma malam, bokono na ngai ekobaki kokoma makasi, pe lokola nazalaki kopakola nkisi na maboko pe na makaka na ngai, nakanisaki ete ekokaki kozala na ntina na yango nde nazalaki kobikisama te. Na bongo nakanaki kotika kosalela nkisi nyonso pe kotika likambo na ngai mobimba epai na Nkolo. Mwa 10 na sanza ya motoba, Ndeko Branham na Ndeko Seward babondelaki lisusu mpo na ngai pe Nkolo abikisaki ngai, nkembo na Nkombo na Ye mosantu! Kalakala Ndeko Branham apakolaka ngai mafuta mpo makaka na ngai ezalaki patatalu. Nazalaki koyoka mpasi makasi na makaka na lolenge ete mpo na ngai kotambola

ezalaki monioko. Kasi uta apakola ngai mafuta, makaka na ngai ekoma makasi, pe lelo oyo nakoki kotambola ntaka molai pe nakoyoka mpasi mingi te na makaka lokola ntango nazalaki kotambola ntaka mokuse liboso ete bapakola ngai mafuta. Nalingi kobakisa ete oyo ezali mbala ya liboso te ete Nzambe abikisa ngai. Eleki mibu ntuku mibale na moko, nazalaki na liyangani moko oyo ekambamaki na Rev. C. H. Erickson na Columbus, Ind. Bato mosusu babikisamaki na mpasi ndenge na ndenge, pe lokola naumelaki ntango molai na bokono makasi ya miyoyo pe lokola nazalaki lisusu na mwa mbuma na liso ya mobali oyo ezalaki kopekisa ngai ete namona malamumu te (yango elingaki sukasuka kokomisa ngai mokufi miso), ngai, pe nasengaki na Nkolo ete abikisa ngai pe Asalaki yango. Uta ntango wana natikali lisusu kobela moko na makono oyo mibale ata mbala moko te. Nazuaki lipamboli yango wana efandaki ngai na kiti, mpo nasengaki na Ndeko Erickson te ete abondela mpo na ngai. Namonaki bato kobikisama na nzoto, nayokaki bato koloba na ntina na yango, pe natangaki matatoli ya bato mosusu. Esili koleka pene na mibu mibale nazalaki koleka liboso ya ndako moko, pene na Prospect, Ky. Bebe moko azalaki kobela pe balalisaki ye libanda likolo na matela ya matiti, pe mama na ye ayebisaki ngai ete autaki kokokisa sanza minei pe ete azalaki na bokono ntango nyonso na mwa bomoi na ye mobimba. Akondaki mingi pe bakokaki koleisa ye te pe azanga koganga na mpasi. Lomongo oyo elandaki nayeabisaki Ndeko Branham na ntina na mwana wana. Ye na losambo babondelaki mpo na bebe yango, pe nsima ya mwa mposo nalekaki lisusu liboso ya ndako yango, pe natunaki nsango ya bebe yango. Azalaki kozongela bokolongonu bwa nzoto pe abandaki kokoma monene. Nakotaki na ndako mpo namona ye, azalaki kolia pe kosepela na yango mingi. Ekomami ete Tata na biso na Lola apesaki na Mwana na Ye Yesu Klisto, bokonzi nyonso na Lola pe na mokili, pe ete Apesaki Ye Nkombo eleki nkombo nyonso, pe Petelo alobaki ete ezali nde na Nkombo na Ye, na nzela na kondima na Nkombo na Ye, nde motengumi abikisamaki na Ekuke ya Tempelo. Ezali bobele na Nkombo yango ya nkembo nde

misala oyo ya kokamwa ezali kosalema lelo. Pe ntango tobikisami na nzoto uta na libondeli na kondima, tozali kozua bobele lipamboli oyo wana te, kasi yango ezali komema pe elikia ya bolimbisami ya masumu na biso. Yakobo 5.15.

Matondi na Nzambe mpo ete lelo oyo na mokili oyo ya kilikili tozali na bato lokola Ndeko Branham, Erickson, John Sproul pe bamosusu baoyo Molimo apesi bango likabo ya lobiko na nzoto kouta na Nzambe. Yesu Klisto azali motindo moko lobi, lelo pe libela na libela. Azali na makoki ya kobikisa pe Amilengeli mpo na kosala yango pelamoko na ntango Azalaki koteya Nsango ya Bokonzi pe kobikisa bato esili koleka mibu nkoto moko na nkama libwa. Namonaki lisusu Joan Gray, bebe oyo azalaki na bokono, mwa 26 na sanza ya mwambe. Sasaipi akokisi koleka sanza 27 pe azali malamumu pe na nzoto kolongonu na ndenge ekoki.

Wa bino kati na Yesu Klisto,

G.W. Jones, 705 balabala Maple E., Jeffersonville, Ind.

Bananga ba bolingo, bato mosusu babikisamaki pe bakosepela kopesa matatoli na bango lokola batatoli ya Nguya na Nzambe kasi na kati ya mwa buku oyo tozali mpenza na esika te. Matatoli oyo epesami ezali na ntina ete epesa bino mpiko ya kondimela Yesu Klisto pe ya koyeba Ye lokola Mobikisi ya bomoi pe ya nzoto na bino.

Batangi mingi ya Biblia, balobaka : “Soki nabikaki na ntango ya Biblia, nalingaki kokende epai na Yesu pe Alingaki kosunga ngai.” Moninga na ngai, Azali awa mpo na kosunga yo lelo, pelamoko Azalaki kosunga na eleko oyo kuna. Ndimela bobele Molimo Mosantu, Azali Motatoli na Yesu. Nalombi yo, na esika ozali, ndimela Ye, pe okobikisama.

LITEYA

Eteni na biso ya Biblia ezuami na Yisaya 53.5.

“Azokisami mpo na masumu, Atutami mpo na mabe na biso. Etumbu oyo eyeiseli biso kimia etiami epai na Ye, pe na mapipi na Ye, biso tobikisami.”

Sasaipi moninga na ngai, Biblia elobi : “Tobikisami nde na mapipi na Ye.” Pe tobelemi mpo na kondima ete kino lelo oyo tozali na bolimbisi ya masumu na biso na nzela ya Makila na Ye oyo esopanaki, ata soki tosalaki nini. Mpo na nini? Okoki koloba ete mpo ete ezalaki eteni ya mbondi. Boye mapipi na Ye mpo na lobiko ya nzoto ezalaki pe kati na mbondi te? Na bongo soki mbondi mpo na lobiko na nzoto ebungisi nguya na yango, na ntango wana ozali kati na masumu na yo; mpo, mbondi ya masumu na yo esalemaki bobele na Makila yango oyo eutaki bobele na moto yango, bobele na esika yango, bobele na ngonga yango, bobele na mokolo yango.

Boye okosengela koloba ete to yango nyonso mibale ezali na nguya, to moko te ezali na nguya.

Te, moninga na ngai, ndimela Yesu mpo na lobiko na yo ya nzoto lokola pe mpo na masumu na yo, pe mbondi ekozala na mbano ndenge moko. Ekozala na nguya mpo na yo na ngambo nyonso mibale, soki ondimi ete esalemaki mpo na yo lelo pelamoko esalemaki mpo na baoyo ya eleko oyo kuna.

Ezali lokola ntango okendeke kozua masuwa mpo na kokatisa ebale, ozali komona bamosusu kokatisa, na bongo mpo na nini yo te? Okokende epai ya kapiteni ya masuwa te mpo na kotuna ye soki masuwa ekokoka kokatisa to te. Okofuta bobele tike na yo, okokota pe okofanda. Na nsima etali nde motambwisi ete akomisa yo na ngambo mosusu ya ebale.

Ezali ndenge moko na lobiko ya nzoto kouta na Nzambe, ozali komona bamosusu kobikisama, yo pe okoki kobikisama.

Kende bobele epai na Yesu. Tike mpo na likambo oyo ezali nde kondima, na nsima etali nde Yesu ete akomisa yo na ngambo mosusu.

Oo, ndeko mobali pe ndeko mwasi, ndimela Ye, yo pe okoki kobikisama. Ntango na bikamwa esili naino te mpo na baoyo bandimi ete yango esili te.

Osalaka liboso nini soki ozali kolengela limpati na zamba? Okokende kokamata manaka ya koyebisa ntango mpo na kotala soki mokolo yango manaka yango elobi ete mbula ekonoka to ekozala mokolo kitoko. Pe okosepela soki elobi ete mokolo yango ekozala kitoko. Na bongo okoloba : “Tokolengela limpati na zamba mpo na mokolo wana.” Okosomba biloko nyonso mpo na bilei na bino pe bokomilengela mpo na kobima se mpo manaka elobi ete mokolo yango ekozala “kitoko”.

Oo, ndeko mobali pe ndeko mwasi, soki ozali kotia kondima monene boye likolo na manaka, mpo na nini okoki kondimela Liloba na Nzambe te? Omikanisela Nzambe azalaka ntango nyonso na bato oyo bandimaka, mpo na nini okoki kozala moko na bango te sasaipi? Tanga Malako 16 pe okomona ete etinda ya suka oyo epesamaki na lingomba ezalaki ete babikisa babeli. Alobaki : “Bilembo oyo bikobila baoyo bakondima.”

Soki na lingomba na bino balobaka ete bandimi kasi bilembo bizali kobila bango te, na bongo kokokana na Liloba na Nzambe bandimi te.

Tuna moto moko lelo soki elembo nini ezali malamumu mpo na koyeba mondimi pe bakotalisa yo moto monene kati na bato. Moto oyo atiaka mbongo mingi na ekolo ya makabo. Oh moninga na ngai, bamosusu kati na bango bayebi ata Nzambe te pelamoko mo-Hottentot ayebi masapo ya Ezipito te, pe bamosusu kati na bango bazali bato na mayele mingi, na bizaleli malamumu mingi, pe basilisa kelasi ya likindo. Kasi esengeli bobele te ete ozala moto na mayele mingi mpo na koyeba Nzambe. Kasi esengeli mpenza ete osala makambo

mingi koleka ebele kati na bango, osengeli kondima, pe soki ondimi bilembo ya Malako 16.17-18 bikobila yo ndenge Yesu alobaki.

Omikanisela na Malako 16 elobami ete boteya Nsango Malamu epai na bato nyonso. Mbala mosusu okoki koloba : “Ndeko Branham, Nsango Malamu ezali nini, mpo tokoka koyeba soki tozali na yango to te. Yango ezali Liloba?”

Polo alobaki ete Nsango Malamu eyei epai na biso bobele na maloba te kasi na Nguya pe Komonisama na Molimo Mosantu. Boye esengeli na yo te ete ozala na Nguya ya Molimo Mosantu mpo na komonisa bilembo oyo ya Malako 16?

Kamata elongo na ngai 2 Timote, mokapo ya 3 pe okomona ete Molimo Mosantu alobi ete na mikolo ya suka bato bakozala na lolenge ya kosambela nde bakozala koangana Nguya na yango, pe Biblia elobi na yo ete okende mosika na bato ya boye.

Boye oyo ezali elembo ya kotalisa te ete tozali kobika na mikolo ya suka? Bato bazali koangana Nguya oyo ezali kobikisa pe kokangola na masumu.

Mangomba ekomi mpio mingi na lolenge ete termometre ekiti kino na ntuku motoba na nse ya zero. Okoki te kozala na elonga pe kosalela lobiko kouta na Nzambe wana ezali yo komipesa na masano ya kalati pe na makaya. Bato mosusu bakendeke na ndakonzambe na ntongo ya lomongo na likaya monene na monoko, lokola ngombe ya Texas oyo balongoli maseke. Liloba eyebisi biso ete tomipetola na mbindo nyonso. Oo ndeko, longwa na makambo na bino ya mokili pe salela Nzambe. Na bongo Akotika yo kotambola na balabala na Ye ya Bosantu oyo elobami na Yisaya mokapo ya 35.

Soki moto moko amemeli yo lokasa ya kozua mbongo na motango ya \$70.000,00 okobanda kosepela. Soki natuni yo mpo na nini ozali na esengo boye, okoyanola ete ozui \$70.000,00. Soki nati tembe na yango okopesa ngai lokasa yango. Soki nalobi ete ezali bobele eteni ya lokasa na makomi likolo na yango, okoyanola ngai na lombango ete moto moko asengelaki

kotia \$70.000,00 na sanduku ya leta ya Amerika liboso ete lokasa oyo ekomama pe ete na bongo leta ekondima kopesa mbongo oyo ekomami na lokasa yango.

Na bongo yeba ete Yakobo 5.14 elobi ete libondeli na kondima ekobikisa mobeli. Mbala mosusu okoki koloba ete ezali kaka lokasa na makomi likolo na yango. Kasi ndeko, Lola mobimba endimi kopesa oyo ekomami kati na Biblia.

Ntango ozali kotanga Liloba na Ye omikanisela ete elaka ezali mpo na yo. Na nsima banda kosepela pe kondima, pe Akobikisa yo.

Azali Nzambe motindo moko lelo, pe mpo na libela. Amen.

Esalemi na lingala na 2004.

LINGALA

©2004 VGR, ALL RIGHTS RESERVED

VOICE OF GOD RECORDINGS

P.O. BOX 950, Jeffersonville, Indiana 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org